

Su a Aufschdiech schdrenge on ...

Iech kann kann Fußballblotz mehr sähng!

Morng ned und iebermorng aa ned gleich. Wie zerledsd alla Wochn zwaamoll draußn schdeh ze missn und zuzeschaua, schdrenge nämlich on.

Und wer ist schuld? Altzo fier miech is des der Drähner. Der sochd vor der Säsong, etzt schdeing mer amoll auf und alla soong: no altzo nocherd, wanner maand, schdeing mer hald auf.

Wenn iech ehrlich binn, hobb iech do aa zererschd gedochd, der maand wull aa, er is der Kees, bluus wall er schdingt. Obber am End hodders bewiesn, Hud obb ! Oder Schabooh !, wie die Franzuusn sohng.

Bluus, wer dengd dabai on miech ? Kaaner !

Do brummsd gleich noch der Ärberd mid Karacho noch Windischenhoch oder sunsd wu no, wusd sunsd nie hie kummsd, dann schdisd jedesmoll draußn mit schwaaßnossa Hend und dengsd, hoffentlich ist de Schbill ball aus! Und wens dann aus is, dann dengsd, hoffentlich derwischen diech die Griina ned, wallsd vor lauder Aufrechung fimb f Seidla Bier gsuffn hosd.

Dann kimmsd endlich glicklich haam und dann schdängerd diech aa nuch die Fraa on und held der vor, dassd scho widder besuffn wärsd und dann broffezeit se der, dass diech die Bolizei scho irchendwann derwischen wird, und des alles, wall sa ned waaß, dass du bluus su aufgreechd wirksd, wallsd Angst hosd, dass dich die Bolizei irchendwann derwischd.

Und wensd deiner Fraa dann aa nuch ergläärn willsd, dass des mit besuffn saa nix ze doh hod, sondern wohrscheinlich on die haufn Bier lieng känd, soochd sa meidsns gor nix mehr.

Do drieber reegsd diech dann widderum du su auf, dassd an Hämoglobin-Wert hosd, wie der Jan Ullrich, nämlich ieber fuffzich, und der bewirgd, dass des Blut su dick werd, dassd diech gleich leeng mussd und dann giehd aa scho die Schdängerai widder vo vorna luus.

Obber wissenschaftdlich konnsd aaner Fraa suwiesu nix ergläärn.

Noja, schieß drauf, edserd is endlich gschaffd! Edsd semmer in der A-Glass! Des haasd, eichendlich semmer in der Kreisliicha, wall mer ja aa in der Kreisglass worn und nimmer in der B-Glass. Die C-Glass is dafier jedsd die A-Glass worn. Obber wenn jeder waaß, wu er grad is, is eichendlich worschd, wies haaßd.

Obbs nadierlich in dera Glass su schee wird, wie in der ledsdn, muß mer erschd noch sääng. Und domid maan iech ned des Schbordliche, sondern vor allem das Umfeld. Denn es wor scho wie in aaner gruußn Familie, wenn vo Verein zu Verein aa amoll zwischndurch a Mobbs gedriggd worn ist odder wenn zegor die eingna Schbieler mid die Zuschauer vo die annern su herzlich obbgldsched hamm, dass die nofalln und des dennern fasd wieh dud.

Obber sulang mei Hämoglobin-Werd bassd und miech die Griina ned derwischn, is mer die Glass eichendlich worschd. Vielleicht nimm iech fiern Hämoglobin ja aa amoll des neia Wundermiddl vo die Fohrrad-Fohrer, des EBO (**E**in **B**ier **O**nly), hald schee aans noch annern.

Schau mer hald amoll!

Und der Kreisliicha sei gsoochd:

Halds eiara Mebbs fesd und Obochd!! – Edsd kumma mier!!

der Hälm